

## Bosna i Hercegovina je talac domaćih političara

Bosna i Hercegovina je talac prebacivanja odgovornosti za neučinjeno. Još je na snazi deklarativna podrška evropskim integracijama, jer se svako malo probijaju rokovi i traže ustupci. Uprkos kritikama iz Brisela, naši lideri ne mogu sjesti ni za isti sto. Tako ćemo rezultate mehanizma koordinacije sačekati, jer je rok za odgovore na Upitnik Evropske komisije, koji je uslov za kandidatski status, pomjeren do kraja septembra. Ko se pravda, a ko zaboravlja da je ranije donio odluke koje sada kritikuje?

“Crvenimo se svaki put kad se moramo pravdati, i mnogo više od toga. Naravno da se osjećate kao malo dijete kad se morate pravdati za nešto što je krajnje jednostavno, dostižno, nije to tako teško da se ne možemo dogovoriti” – tako kaže predsjedavajući Predsjedništva BiH Dragan Čović, koji se nije crvenio kao malo dijete kada je govorio o brojnim prilikama koje smo propustili kao što je posljednja: pola milijarde maraka i ulazak u transportnu zajednicu.

Nije se crvenio ni pred zvaničnicima u Briselu jer je prvi dan predsjedavanja bio upravo tamo, želeći iz prve ruke da informira evropske zvaničnike – i nije impresionirao.

“BiH pravi taoca sama od sebe. Političari, zbog svoje nesposobnosti da se dogovore u ime evropske budućnosti – a to je jedino pitanje koje ima značajnu podršku svih u BiH, ustvari su izolirali BiH čak i od ostalih država u regionu”, ocijenio je Miroslav Lajčak, ministar vanjskih poslova Slovačke.

Dok EU iskazuje razočarenje što nismo potpisali međunarodni sporazum, nameće i stare uslove kao što je zakon o akcizama na gorivo, bh. političari se optužuju zbog novog debakla BiH na međunarodnoj sceni. U međuvremenu se pomjera rok za odgovaranje na upitnik Evropske komisije. No, to nikoga ne zabrinjava, uprkos tome što su zemlje regije taj posao završile za četiri ili čak dva mjeseca. Problem je mehanizam koordinacije.

“Moraju znati i ovi u Evropi da neće biti upitnika ni bilo čega drugog dok se mehanizam koordinacije ne uspostavi, a to znači pravila procedure i pravilnici i ostale stvari koje jasno preciziraju kako se dolazi do jedinstvenog stava u BiH”, poručio je predsjednik RS-a Milorad Dodik.

A zaboravio je da je upravo on bio taj koji je prošle godine donio odluku o uspostavi mehanizma koordinacije i da predstavnici RS-a učestvuju u radnim grupama tog istog mehanizma koordinacije kojim se ponosi Vijeće ministara.

“U okviru implemetacije odluke u sistemu koordinacije formirana su sva tijela – Kolegij za EU integracije, Komisija za EU integracije i radne grupe za EU integracije”, kazao je Denis Zvizdić, predsjedavajući Vijeća ministara BiH.

Zvizdić nije uspio uvjeriti parlamentarce da je 2016. bila najuspješnija ikad u evropskim integracijama, a Vijeće ministara je u međuvremenu dalo novi rok za završetak Upitnika – kraj septembra. Članova u radnim grupama je previše, a treba postići saglasnost o 3.242 pitanja. Još jedno pitanje je: hoćemo li bez crvenila zaslužiti kandidatski status do 2018?

60

SHARES

[\\_Share on Facebook](#)

[\\_Tweet](#)

-

-

[Follow us](#)

[\\_Share](#)

[\\_Share](#)

[\\_Share](#)

[\\_Share](#)

[\\_Share](#)

Date: 29-07-2017